

北京圖書館 編

北京圖書館藏珍本
年譜叢刊



第 59 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 59 冊



第五十九冊目錄

方孩末年譜	一
黃子年譜	三九
黃忠端公年譜	一六七
徐霞客先生年譜	四一七
徐霞客先生年譜訂誤	四九一
范文忠公年譜	五〇三
呂明德先生年譜卷首至卷二	五一七

方孩未先生集卷之五

年譜

念道人自題

讀書成進士官侍御史此通顯捷徑也稍稍爲鈍
處後餘地自完需次卿貳節鉞直筐笈中物耳計
不出此直行胸臆錚錚皎皎以自取缺敗首領不
保爲庸夫邨兒所笑居士真愚人也哉反是卽爲
不愚於身家甚得於邨中人眼孔甚得而居士之
心又若跼天躋地無以自容者視羊脂橫玉弗若
長版套頭尚書衙丞相署弗若匣牀一席長安六
尺輿弗若桁楊三木珠襦玉匣弗若熱血市場者

此所謂愚於性而不移其愚也可悲其愚於性也
可敬是則爲孩未方先生故先生年譜非先生自
筆不可必先生自筆而後可悲與可敬者委曲肖
像如寫生然要亦不過自存其本色耳若夫覩遺
編而下淚驚宿草而停車知後世不乏其人然居
士意中已久斷此想使居士而有此想豈其愚猶
可瘳也耶其何以爲居士

萬曆十三年乙酉閏九月十二孩未方先生生先侍
御心宇府君夢白鶴翔空而來止於屋上作人語曰
我天性不食鹽幸勿以鹽相苦語畢飛入室中而余

已呱呱矣又夢正學先生授一金色李故余之名有所自云噫正學先生身丁國難禍奇千古再來而禍之奇也又如是豈先生好涉苦趣耶抑以風刀毒藥爲佛事耶不則烈心火性經千萬劫而不改其常高樹多悲風雖勢所必至然亦太冤苦矣噫浮光幻影知不能驚先生之神然得毋便爲善者增懼報緣已定鬼神若是其無權哉

丙戌先生年二歲

丁亥先生年三歲母孔太孺人從襁褓授書偶試以駢語輒應荅如流府君試駢語曰虎頭帽居士應曰

鳳翅益府君喜曰舍此更能另對否余曰象牙笏自是遂有神童之譽

戊子先生年四歲

己丑先生年五歲始入小學蒙師爲從叔祖海山先生是年王父平山公捐館先生雖幼穉哭泣盡禮人以爲有至性云

丁酉先生年十三歲從華南劉先生學舉子業

戊戌先生年十四歲從仁岐劉先生學

己亥先生年十五歲應童子試郡守舒公琛南昌人也大奇之置前列府試郡丞史公又奇之比入院試

督學陳公懷雲面閱卷曰童子可歸讀書爾之成就不可量也

辛丑先生年十七歲贈君感痰症先生廢書四方求醫有劉玉鉉者有時名先生遂從之學醫盡其術九月贈君捐館舍先生哀毀幾不欲生內遭家難外禦羣侮其孤子如病葉危枝顛顛欲墮矣

癸卯先生年十九歲復從華南劉先生學

甲辰先生年二十歲服闕應儒士考郡守徐公來建楚廣濟人也得先生文如獲至寶延至州衙與其嗣君訂交爾時羣議譁然徐公曰爾等無譁能爲爾壽

建一代旗鼓者必方子也六月先生補諸生七月試
儒學九月試觀察俱第一穎道歐陽宜諸先生更爲
賞識嘖嘖口召以爲長淮間氣而先生聲價始定自
是無敢譁者

乙巳先生年二十一歲軍人賈輅欺余孤嫠以軍田
事訟之督府李公修吾通判郭蒙古承望風旨余至
汝陰就審郭遂羈繫余是時張先生鶴鳴以南考功
郎居里余作詩上之有哀湘弔賈渾閑事願向羈囚
認少年之句張先生爲言於別駕余乃得脫而家徒
自是壁立兒篝燈母紡績其辛苦不忍言矣

丙午先生年二十二歲試督學高等八月鄉試試卷
已填中矣不知何以復被別先生遂棄置帖括肆力
詩文詞曲然亦隨手焚燬不復畱稿曰吾以一時自
愉悅而已不能與雕蟲兒爭故紙長短也故先生詩
文諸體皆有之而存者絕少

丁未先生年二十三歲武林羅元父來署學事每見
余文卽曰眼高手生苦勸余俛首舉子業而併教余
以禪余之棲心淨土羅先生爲大導師也先生雖寄
跡衣冠而熱心冷韻直是一尊古佛余從先生五年
不能盡其萬一鈍根劣質其難化也如此卽被禍時

猶有餘愧耳

戊申先生年二十四歲從元父羅師學有僧月孤者
來講經始與之究楞嚴旨要是年十月舉大兒樸
己酉先生年二十五歲試督學高等秋闈試牘元師
以爲必魁而竟落第八月登雨花臺弔正學先生泣
然不能去有十族悲風淒萬古再來事業問如何之
句先生禍機蓋已識於此悲夫

庚戌先生年二十六歲始下唯刻苦爲時義有夢茲
亭稿行於時

辛亥先生年二十七歲天台彭紫兼師來作郡奇余

文批其首簡曰淮南以解解子以不解解豈大山小山之徒耶延余爲上客又時給燈油薪水余益得肆力時義調甘劑苦以行文而兼養氣揣摩大就矣是年舉次兒馨

壬子先生年二十八歲試州府督學皆第一江夏時爲督學以此因緣余殺身之禍遂基於此豈非天哉是年九月捷鄉書以鄉試改期也余首场不滿志以表冠場得雋房師徐公諱從治浙之海鹽人大座師一爲趙公岐陽諱秉忠一爲邵公芝南諱景堯象山人爾時天台彭先生已陞任回籍余得雋卽擬走天

台踵先生廬一申慰問而先生已千古矣師將易簀猶囑其嗣君曰方子必捷爾可治裝往賀其懸注若此噫余遭時不辰禍奇至此其何以報國士之遇而見師於天上哉

癸丑先生年二十九歲捷南宮周延儒榜房師何公芝岳桐城人大座師則葉公臺山方公冲涵兩相國也是時余名甚燥臺山師遣方太學渭津致意云館選必方子余七月初十偶聞母孺人小恙遂疾走歸里去考館之期纔兩日耳故同年白爾亨正蒙有詩別子云如子才名何不宜徑然拋卻鳳凰池蓋實事

也而余心中更有隱腸贈君彌畱時囑不肖曰俟爾
成進士而後葬我不肖頓首受命頻年雪案咿唔孤
燈夜坐每一念及未嘗不淚潸潸下也顧兩困秋闈
府君不得歸且十年矣今幸而致身倘再畱滯中秘
須兩年乃得請假余又安能一刻待乎余歸遂併日
爲府君卜地襄事彤家有云時日尚未利余亦不暇
顧卒以次年三月奉府君歸土噫甯知地道昭昭而
天道遂墨墨也乎

甲寅先生年三十歲正月完贈君襄事二月赴選京
邸得福建延平府沙縣以吏垣缺不得憑守至經年

十二月赴沙縣任

乙卯先生年三十一歲在沙縣縣有惡俗雄于屠牛
卽蘇子瞻所謂海南以牛爲祭之遺也每屠一牛輸
皮革錢五百文於縣歲屠萬牛且應輸五千金矣先
生嚴爲禁止有倒斃者埋之併刻因果報應等書以
冀其革心也不數月縣無屠牛者八月人閩闔外簾
十一月入覲行李蕭蕭衣裝不備縣人哭泣而送絡
繹千里不絕袁撫院一驥李按院素我署其績曰熱
腸春暖鐵骨冰寒名世無雙循良第一
丙辰先生年三十二歲入覲舉八閩卓異四月復還

沙銷鹽課止官價禁增添舉鄉約以拮据過勞遂致
病劇幾至不起諸政以次第更新家家私爲尸祝矣
丁巳先生年三十三歲在沙立文會課士八閩俊彥
從學者甚衆又雪寃理枉獎拔寒苦閩士遭刖而被
擯者就先生如真父母然其不能婚葬者取先生之
俸如其外府也調繁晉江以撫按畱不果調刻有在
沙腐語及閩士課治蠱奇書等書

戊午先生年三十四歲在沙開荒田清理寺課八月
分考闈中拔李士亨等七人皆知名士十月解沙任
入覲吏民畱戀爲建祠於萬山絕頂先生亦不勝并

州故鄉之感題一聯於縣門曰別我還應想春日問渠曾否擾秋毫十二月抵家謁太母並迎勅命贈府君心宇公如其官母氏封太孺人

己未先生年三十五歲入覲再舉八閩卓異第一故事卓異必先省城附郭者王斗溟中丞愛余特至以故有是舉而趙時用任閩縣孫國楨任侯官遂不能平咨訪行取時廣布蜚語余幾不與考選後雖得畱而萬崇德極不喜予則時用譖之也余之禍根又醞釀於此矣五月余請假歸里六月暫擬戶部主事噫崇德與時用皆江北同里而時用又同籍同官所爭